



Aber das goldt wirdt vom sylber auff diese weis gschieden. Die vermischung soll erstmal in einer Capellen so lang mitt pley gschmeltzt werden/ biß daß alles pley verrieche/ vñ sein marck nuhr fünff quintlin Kupffers/ od auff sechs quintlin in sich halte/ dan so mehr Kupffers in im sein wurde/ so wurde das sylber vō goldt gschieden/ bald widerüb mitt im vereinbaret: solchs sylber darein goldt ist/ so es gflossen ist/ soll es eintweders mitt ein stab der vnden zerspaltten in kugelin getriben/ oder in ein eisern guss gossen/ vñnd auß dem so erkaltett/ soll ein düns blatt gmacher werden. Diweil aber die weise kugelin zümachen auß dem goldt das sylberig ist/ ein grössere sorg vñd fleis/ dan auß anderen metallen erfordert/ will ich dise mitt wenig Worten jezund erkläre. Dis ist erstmal in tiegel zū werffen/ welcher darnach mit ein treibhüt zū bedeckē/ vñ in rond ein rönern vhaß zūsetzē/ das ein wenig äschen in sich halte/ als dan seindt sie also in heingē zūsetzen/ daß das feur mitt dem blast des balgs möge eingeblasen werden/ darnach soll man kolen darumb schütten/ vñ daß sie nicht herab fallendt/ mit stein oder ziegeln zūbewaren/ bald sollen die kolen in das obere vhaß gworffen werden/ vñ über sie glüende kolen/ auff welche widerumb kolen zūwerffen seindt/ damit das rond rönern vhaß mitt ihnen vmbgeben/ vñ bedeckt werde/ welches man soll ein halbe stundt oder ein wenig lenger mitt glüenden kolen lassen heiß werden/ vñd fürsāhen daß es/ so kein kolen verhandē/ widerümb erkaltē. Nach disem/ sol der blast durch die liesse des balgs hinein geblasen sein/ daß das goldt zū fließen anfahe/ bald ist es vmbzūwenden/ vñd ein prob genomen/ zūbedencken eb es gnüg seye gflossen. So es gflossen ist/ soll man im ein zūsatz geben/ vñd
das